

D' Missiounskräiz vu Koplescht



Um Fréijoerstréppeltour 2015 vu „SICONA“ a vu „Koplescht - fréier an hott“ gëtt beim Missiounskräiz Statioun gemaach. De Jos Junck gëtt Erklärungen. Do koum d'Iddi op, fir déi Geschicht vum Missiounskräiz an engem vun eisen Hefter nidderschreiwen.

Op engem Tréppeltour am Fréijoer 2015 - organiséiert vu „SICONA“ a „Koplescht - fréier an hott“ - ass och um Muesbiërg beim Missiounskräiz Statioun gemaach ginn. Nieft den Erklärungen iwwert d'Planzen, d'Blummen an d'Beem, déi do um Fielsplateau an och an der Fielswand wuessen, huet de Jos Junck gefrot, ob ee wéisst, wat et mat deem Missiounskräiz op sech hätt. Et huet sech erausgestallt, dass - mat Ausnahm vun e puer Aler - keen doriwwer Bescheed wouss. Ee vun deene méi Jonken huet gemengt, en hätt emol eppes héiere vu Missiounen an Afrika, ob et dann eppes domadden ze doen hätt?

De Jos huet dunn erzielt, wéi, wéini a firwat dat Kräiz 1953 op deem Fiels an de Saan-gelayen opgeriicht ginn ass. Mir hu fonnt, et wier derwäert, fir déi Geschicht an engem vun eisen Hefter ze dokumentéieren. Wat mer dann elo an dëser Nummer 15 maachen.

Mat de Missiounen an Afrika huet d'Kopleschter Kräiz net direkt eppes ze dinn; an dach ass déi Fro, déi dee jonke Mënsch beim

Tréppeltour gestallt hat, berechtigt. Mir versichen ze erklären, firwat dat esou ass.

Vu Missiounen, Missionaren a Missiounsaarbecht gëtt hautesdaags net méi vill geschwat. Dat war viru 70 Joer ganz anescht. Zu Koplescht wouss mir Kanner deemools doriwwer gutt Bescheed. Dat hate mer de Wäisse Pateren am Mariendall - fir äis de „Märjendaul“ - ze verdanken. Am Reliounsunterricht hu mer erzielt kritt, dass de Pateren hir Aarbecht, hir Aufgab, dora bestanen huet, fir deenen ongleewegen Negeren - jo, esou hu mer gesot - de chrëschtliche Glaw ze bréngen.

Hir Missioun war et, d'Heeden ze bekéieren. Si waren d'Missionaren, an do, wou se gewierkt hunn, dat waren d'Missiounen. Am Märjendall haten d'Wäiss Pateren hiirt Klouschter. Wann e Pater ewell méi eng laang Zäit „an der Missioun“ war, dann ass e fir e puer Méint an de Märjendall komm, wou e sech konnt erhuelen. An deer Zäit ass en da vun den Häre Paschtéier aus den Dierfer ronderëm invitéiert ginn, fir am Reliounsunterricht iwwert d'Missiounen ze schwätzen. An all Joer si mer mat der Schoul en Ausflug an de Märjendall maache gaangen. Wat äis do am meeschten interesséiert huet, dat war de Missiounsmuseum. Léiwen an Tigeren, déi hir geféierlech Zänn gewisen hunn, Krokodilen, d'Maul wäit opgerappt, an nach vill aner wëll Déieren hunn äis et Angscht gemaach, och wann se nëmmen opgestoppt waren.

Wann d'Pateren äis vun den aarmen Heedekënnercher geschwat hunn, dann hu mer bal misse kräischen. Mee mir konnten hinnen

Sonndes, de 17. Mee 1953 ass d'Missiounskräiz a feierlecher Pressessioun op de Muesbierg gedroe ginn. Op de Fotoe gesäit een, dass dobäi d'ganzt Duerf matgemaach huet.



D' Pompjeeë féieren d' Pressessioun un. - Coll. Vic Kremer - Foto: Théo Mey



D' Joffer Poos mat hire Schoukanner... - Coll. Vic Kremer - Foto: Théo Mey